

Značajni zvanični događaji i posjete u NUBBiH tokom 2009. godine

Important official events and visits in NULB&H in 2009

Merima Arslankadić, bibliotekar / Librarian

Nacionalna i univerzitetska biblioteka Bosen i Hercegovine/ The National and University Library of Bosnia and Herzegovina

71 000 Sarajevo BiH

merimab@nub.ba

www.nub.ba

Tokom 2009. godine Nacionalnu i univerzitetsku biblioteku Bosne i Hercegovine (NUBBiH) su posjetili prijatelji ove institucije, kolege bibliotekari i mnogi zvaničnici za koje je NUBBiH posebno organizirala primanja.

NUBBiH je organizirala i održala više seminara i radionica, kurseva iz osnovnog bibliotečkog znanja i obuku djelatnika za rad u COBISS-u, književne večeri austrijskih spisateljica Andree Winkler i Eve Menasse.

NUBBiH je bila domaćin osnivačkog skupa Kulturni forum BiH.

Časopis ove biblioteke Bosniaca nagrađen je na XXI. sajmu knjiga, učila i muzičke produkcije u Sarajevu u kategoriji "Najbolji časopis". Također, u ovoj godini časopis je indeksiran u bazama podataka EBSCOhost i C.E.E.O.L.

Obilježena je 17. godišnjica razaranja Vijećnice i stradanja NUBBiH, a aktivnosti oko obnove ove zgrade još uvijek nisu u potpunosti aktuelizirane. Direktor NUBBiH se, zajedno sa ostalih šest direktora institucija kulture od značaja za Bosnu i Hercegovinu, obratio nadležnima u BiH za rješavanje pitanja egzistencije ovih institucija. Učesnici 15. Sajma knjiga u Istri uputili su Apel javnosti za rješenje statusnog i finansijskog problema NUBBiH. Na inicijativu Dine Mustafića, senatori Evropskog kulturnog parlamenta (European Cultural Parliament) usvojili su Rezoluciju podrške kulturnim institucijama u BiH u cilju očuvanja kulturno-historijskog naslijeđa i kulturnih institucija koje su od neprocjenjive važnosti za državu BiH.

During 2009 the National and University Library of Bosnia and Herzegovina (NUBBiH, NUBB&H) has been visited by friends of this institution, colleagues librarians and many officials for whom NUBB&H organized receptions specially.

NUBB&H organized and held a few seminars, workshops and courses from elementary library science and the employee instructions for working in COBISS and poet eves of Austrian authoresses, Andree Winkler and Eve Menasse.

NUBB&H was a host of incipient meeting Cultural Forum of B&H.

Periodical of this Library, Bosniaca, was awarded on XXI book-fair, means of instruction and musical production in Sarajevo in the category „The best periodical“. Also, this year the periodical has been indexed in data base EBSCOhost and C.E.E.O.L..

It was denoted the 17th anniversary of Vijećnica (Town Hall) destruction and suffering of NUBB&H and the activities about reconstruction of this building not yet made completely. The director of NUBB&H with other six directors of cultural institutions of great importance for Bosnia and Herzegovina referred to the authorities in B&H for solving the existence of these institutions. Partners of the 15th Book-fair in Istra appealed for help to the public for solving social and financial position of NUBB&H. On Dino Mustafić's own initiative, the senators of European Cultural Parliament adopted the Resolution of support to cultural institutions in B&H with the aim for preservation of cultural and historical heritage and cultural institutions which are with priceless importance for state B&H.

NUBBiH organizirala prijem za učesnike 5. međunarodnog susreta bibliotekara slavista u Sarajevu

Peti međunarodni susret bibliotekara slavista održan je u aprilu u Sarajevu. U okviru susreta, organiziran je i prijem za učesnike, na čelu s prof. dr. Robertom Donia, u zgradi NUBBiH, gdje je razgovarano o uslovima i načinu rada ove biblioteke.

Tema ovogodišnjeg susreta bila je: Vratiti korisnike bibliotekama. Susret je bio posvećen onima zbog kojih biblioteke i postoje – korisnicima. Na prvim susretima učesnici su upoznavali zbirke i njihov razvoj: Balkan je upoznao zbirke u svijetu i Balkan se predstavio svijetu. Na drugim susretima je razgovarano o budućnosti slavističkih zbirki i fondova, dok je treći imao akcenat na digitalizaciji zbirki. Fokus četvrtih susreta stavljen je na prezentiranje primjera najboljih praksi u oblasti koje se čine ključnim za razvoj bibliotečke djelatnosti: finansiranje bibliotečke djelatnosti, suradnja sa drugim institucijama i pitanje kadrova u bibliotekama. Ovogodišnja tema je nastala kao logičan slijed prethodnih susreta.

U drugom dijelu susreta, u Fojnici, predstavljene su biblioteke vjerskih zajednica u BiH, i posjećena biblioteka samostana u Fojnici.

Osnovan Kulturni forum BiH

U Nacionalnoj i univerzitetskoj biblioteci BiH polovinom aprila osnovana je, uz učešće brojnih kulturnih djelatnika iz cijele zemlje, nezavisna kulturna organizacija Kulturni forum BiH, koja ima za cilj popraviti situaciju u kojoj se nalazi kultura u našoj zemlji.

Organizacija će se baviti razvojem partnerstva između umjetnika, kulturnih djelatnika, institucija kulture, organizacija, asocijacija kulture i vlasti te izgradnjom strategije podrške talentima, mladim umjetnicima i inovatorima, a insistirat će se i na izdvajanju većeg iznosa iz svih budžeta za kulturnu politiku BiH.

„Članovi Foruma planiraju krajem godine organizirati kongres, te insistirati na povećanju utjecaja kulturnih stvaralaca na politiku BiH. Zahtijevat će se da u svim komisijama koje donose odluke o kulturi na svim nivoima vlasti bude zastupljeno 60 posto umjetnika“, rekao je Ibrahim Spahić, predsjednik Upravnog odbora Kulturnog foruma BiH. Osnivači te nevladine organizacije namjeravaju insistirati na vraćanju NUB-a u prostor Vijećnice.

Bosniaca - časopis NUBBiH nagrađen na XXI. sajmu knjige, učila i muzičke produkcije u Sarajevu

Sarajevski sajam knjige, učila i muzičke produkcije, 21. po redu i 10. bijenale knjige i ove je godine zatvoren dodjelom sajamskih nagrada u 17 kategorija. Posebno je zadovoljstvo istaći da je Bosniaca, časopis Nacionalne i univerzitetske biblioteke BiH, nagrađen u kategoriji „Najbolji časopis“.

Bosniaca je renomirani stručni časopis, jedini u BiH iz oblasti bibliotekarstva i informacionih tehnologija u kojem surađuju autori iz cijelog svijeta. Časopis ima međunarodnu redakciju i recenziju. Zastupljen je u nekoliko baza podataka.

Ovom prilikom članovi redakcije zahvalili su svim kolegama koji su dali doprinos u izradi i ovog 13. broja časopisa Bosniaca.

Dobitnicima su nagrade dodijelili: predsjednica žirija književnica Ljubica Ostojić i organizatori XXI. međunarodnog sajma knjige, učila i muzičke produkcije i X. bijenala knjige Suad Džindo, direktor KSC Skenderija, Tajib Šahinpašić, direktor TPK „Šahinpašić“, i Ibrahim Spahić, predsjednik Udruženje izdavača i knjižara u BiH. Ovogodišnji članovi žirija bili su: Ljubica Ostojić, Željko Grahovac, Marina Trumić, Jasmina Sejtarija, Nevenka Hajdarović i Almir Kurt. (Sl. Zahvalnica)

Mile Bošeski, direktor Nacionalne i univerzitetske biblioteke „Sv. Kliment Ohridski“, Skopje – Makedonija, sa saradnicima posjetio NUBBiH

Kolege i saradnici iz Makedonije posjetili su NUBBiH, gdje su obišli zgradu biblioteke, te odjeljenja i sektore. Ovaj put namjera im je bila bliže se upoznati s redovnim aktivnostima biblioteke s kojom imaju potpisan sporazum o saradnji još od 2006. godine, te razmijeniti najnovijih izdanja iz Republike Makedonije i Bosne i Hercegovine.

Sporazum o saradnji ove dvije biblioteke podrazumijeva razmjenu knjiga, magazina, novina, elektronskih izdanja – CD romova, mikrofilmova i drugih vidova bibliotečnog materijala izdatih u Makedoniji i u BiH. Također, sporazumom je dogovorena razmjena stručnih, naučnih, bibliografskih i drugih vlastitih izdanja, te realizacija zajedničkih projekata: izložbi, seminara, publikacija, konzervacija i restauracija i slično.



G. Mile Bošeski u posjeti NUBBiH

IOP seminar održan u NUBBiH

IOP seminar održan je u maju 2009. godine u Multimedijalnoj sali u Nacionalnoj i univerzitetskoj biblioteci BiH.

Teme i predavači na ovom seminaru su bili: IOP Publishing i eIFL License u Bosni. How does it work for you? - Yann Amoureux regionalni menadžer IOP Publishing, te Šta radimo kada nemamo para? Unapređujemo uslugu - Biljana Kosanović, KoBSON - Konzorcijum biblioteka Srbije za objedinjenu nabavku.

Korištenje baze podataka IOP (Institute of Physics) je besplatno za cijelu BiH za 2009. godinu putem EICBiH (Elektronsko-informacionog konzorcija BiH).

Yann Amoureux kazao je kako je na njega posjeta u NUBBiH ostavila snažan dojam, jer se upoznao sa poteškoćama koje su stavljene pred bibliotekare u BiH, s radom Vlade BiH takvim kakav jeste, te izazova davanja usluga bez adekvatnog finansiranja. Zapanjen je situacijom u kojoj se nalazi NUBBiH: „Čak ni Kafka ne bi to mogao opisati u svojim fantastičnim pričama“, naglasio je gospodin Amoureux.

Književni sat u NUBBiH sa spisateljicom Andreom Winkler

Austrijska spisateljica Andrea Winkler na svom čitateljskom putovanju kroz Bosnu i Hercegovinu u periodu 17-23. 5. 2009. godine (Banja Luka, Sarajevo i Tuzla) posjetila je i Nacionalnu i univerzitetsku biblioteku BiH.

U prostorijama Multimedijalne sale NUBBiH spisateljica se sreća sa studentima germanistike Filozofskog fakulteta Univerziteta u Sarajevu, te čitala na njemačkom jeziku svoja djela.

Andrea Winkler je rođena 1972. godine u Freistadtu, živi u Beču. Završila je studij germanistike i kazališta. Više godina aktivna je u radu s mladima i odraslima. Od 2006. godine slobodna je spisateljica. Drži literarne seminare na Umjetničkom sveučilištu u Linzu te povremeno sastavlja priloge za Ö1, kao i za „Spectrum der Presse“. Piše eseje u različitim antologijama, između ostalog o Robertu Walseru, Friederike Mayröcker i Peteru Handkeu.

Neki od njenih radova su: Arme Närrchen. Selbstgespräche. Droschl 2006., Hanna und ich. Droschl 2008. Neka od njenih priznanja su: Stipendija Hermann Lenz 2005., Nagrada Theodor Körner 2005., Abraham-Woursell-Award 2006., Stipen-

dija Adalbert Stifter pokrajine OÖ 2007., Nositeljica je nagrade literarnog natjecanja Wartholz 2008., Poticajna nagrada Republike Austrije 2008.

Sastanak članica COBISS sistema Bosne i Hercegovine

U utorak, 16. juna / lipnja 2009. godine, u prostorijama Nacionalne i univerzitetske biblioteke BiH, održan je sastanak članica COBISS sistema Bosne i Hercegovine. Teme sastanka su bile: Informacije o novim članicama COBISS.BH i rad u sistemu, informacije o E-CRIS.BIH, razmatranje godišnje statistike punopravnih članica sistema COBISS.BH, informacije o Konferenciji COBISS 2009. Prisutni su upoznati sa budućim planovima i aktivnostima koje se vode u ViBBiH centru, a sve u svrhu stabilnog funkcionisanja sistema uzajamne katalogizacije u Bosni i Hercegovini.

Podrškom Federalnog ministarstva obrazovanja i nauke, univerzitetske biblioteke u Federaciji BiH bogatije su za 1.500 naučnih i referentnih izdanja

U prostorijama Federalnog ministarstva obrazovanja i nauke u Mostaru uručeni su kompleti enciklopedijskih, naučnih i visokoškolskih izdanja predstavnicima svih šest univerzitetskih biblioteka na području FBiH.

Riječ je o 1.500 naučnih i referentnih izdanja koja će znatno obogatiti bibliotečki fond svih visokoškolskih ustanova u FBiH. Federalno ministarstvo obrazovanja i nauke je u posljednje dvije godine putem različitih programa i projekata podrške radu biblioteka visokoškolskih i naučnih ustanova u FBiH uložilo 800.000 KM, čime je pružena značajna podrška i izdavačkoj djelatnosti u cjelini.

Pored značajnog obogaćivanja knjižnog fonda, Federalno ministarstvo obrazovanja i nauke je univerzitetskim bibliotekama osiguralo i besplatan pristup na međunarodne naučne baze podataka Web of Science i CurrentContentConect za akademsku i naučnu javnost i studente u Federaciji BiH. Ukupna vrijednost ovog projekta, koji je uspostavljen 2007. godine i treba da traje naredne tri godine, iznosi 300.000 KM. Istovremeno, Federalno ministarstvo je finansiralo uključivanje biblioteka u bibliotečko-informatički sistem COBISS.

Također, ovo ministarstvo od 1. 1. 2007. godine finansira i Registar naučnih institucija, naučnog kadra i infrastrukturnih ulaganja u FBiH, što podrazumijeva finansiranje troškova radnog mjesta i održavanja sistema, kao i održavanje hardvera, softvera i ažuriranje baze podataka, dok NUBBiH izvršava poslove i zadatke na upravljanju sistemom Registra i njegovom održavanju. Registar je online aplikacija koja objedinjuje podatke o istraživačima i istraživačkim organizacijama u Kantonu Sarajevo, a cilj je uspostavljanje jedinstvenog istraživačkog prostora.



Časopis Bosniaca indeksiran u bazi podataka prestižnog informacionog servisa EBSCOhost

Časopis Nacionalne i univerzitetske biblioteke Bosne i Hercegovine Bosniaca indeksiran je u bazi podataka Central & Eastern European Academic Source, koja je dostupna preko prestižnog informacionog servisa EBSCOhost.

Bosniaca je časopis NUBBiH koji izlazi jednaput godišnje i u njemu se objavljuju originalni znanstveni i stručni radovi, a sada je putem EBSCOhost servisa dostupan i čitalačkoj publici širom svijeta.

Obilježena 17. godišnjica od razaranja Vijećnice

Kako bi obilježili 17. godišnjicu stradanja Nacionalne i univerzitetske biblioteke Bosne i Hercegovine i njene zgrade, u Vijećnici su se 25. 8. 2009. godine okupili zaposlenici ove biblioteke.

Građani Sarajeva koji su 1992. godine ostali u ovom gradu sjećaju se stravičnog plamena u noći 25./26. augusta, kada je za samo nekoliko sati potpuno uništena Vijećnica, simbol grada Sarajeva - Nacionalna i univerzitetska biblioteka Bosne i Hercegovine.

Vijećnica – NUBBiH je za svakog Bosanca i Hercegovca predstavljala simbol duhovnosti i dokaz višegodišnje isprepletenosti tradicija i kultura sa ovih prostora, bila je mati, učiteljica mnogim generacijama, pa čak i onima koji su se usudili podići ruku na nju.

Početak rata 1992. godine NUBBiH je dočekala u Vijećnici sa fondom od oko tri miliona publikacija, unutar kojeg je bila i vrijedna zbirka sa više od 6.000 rijetkih, starih knjiga i rukopisa. Međutim, u samo jednoj noći vatra je progutala skoro cjelokupno nacionalno blago BiH koje je Biblioteka skupljala, stručno obrađivala, čuvala i davala na korištenje blizu pola stoljeća. Oko 90 posto knjižnog fonda, katalozi, oprema... znanje i hiljadugodišnja historija u nekoliko sati uništeni su, odnosno protjerani iz svoje kuće.

Već deset godina uposlenici Biblioteke u neadekvatnim i „privremenim“ prostorijama, jedva dovoljnim za smještaj spašenog fonda, i pored raznih nedaća (neriješenog pravnog i finansijskog statusa), trpeći sve moguće nedaće, u kojima su i ostale institucija kulture od značaja za BiH, ipak uspješno obavljaju sve poslove koje jednoj nacionalnoj biblioteci državni zakon i propisuje.

Obnova Vijećnice, izvjesno je, trajat će još neko vrijeme, a izgledi da se NUBBiH u punom kapacitetu vrati u ovo zdanje sve su manji. Trenutno ne postoje ni naznake da će za Biblioteku biti izgrađena nova namjenska zgrada, po evropskim standardima...

Ali, novina je da joj je, u odnosu na 2007. godinu, i u 2009. Vijeće ministara smanjilo dotaciju za jednu trećinu. Stoga se pitamo: imamo li mi zaista budućnosti, da li Bosni i Hercegovini uopće treba NUBBiH?! Da li je, kao što je govorio naš nobelovac Ivo Andrić, „biblioteka naša nasušna potreba“?

Naravno, kao i svake godine, sa nama nisu bili upravo oni koji bi trebali tu biti i od kojih ovisi naša sudbina, niti oni koji su prošlih godina govorili da će ovaj datum proglasiti danom urbicida. Ali ističemo da sa nama danas suosjećaju kolege članica svjetskih bibliotečkih agencija IFLA, CENL, TEL i drugih.

Otvoren izložbeni salon knjiga povodom Međunarodnog dana pismenosti

NUBBiH je organiziranjem izložbenog salona knjiga u svojim prostorijama obilježila 8. septembar - Međunarodni dan pismenosti.

Svi posjetioci i korisnici dobili su po knjigu na poklon, a uglavnom je bila riječ o publikacijama čiji broj primjeraka zadovoljava fondove Biblioteke. Bili su izloženi naslovi iz prava, evropskih integracija i politike, te primjerci iz beletristike. Predstavljene su i knjige iz austrijske čitaonice NUBBiH, namijenjene studentima germanistike.

Izloženi su bili i udžbenici za studente različitih naučnih oblasti, kao što su elektrotehnika, pravo ili političke nauke. Posjetioci su imali priliku prelistati i nacionalnu bibliografiju sa spiskovima svih izdanja serijskih i monografskih publikacija izdatih na području BiH, te sa sobom ponijeti vlastiti primjerak. Tu se mogu pronaći vrijedne informacije za sve koji se bave istraživačkim radom.

Nakon otvaranja salona zabilježena je iznimno velika posjeta pojedinaca i studenata. U prilog tome govori i činjenica da od oko 150 izloženih naslova nije ostao niti jedan primjerak.

NUBBiH jedna je od rijetkih institucija u BiH koja je, usprkos teškom finansijskom stanju obilježila Međunarodni dan pi-

smenosti.

Komentari koje su posjetio i korisnici usluga NUBBiH ostavljali nakon posjete salonu su veoma pohvalni i govore da su ovakvi događaji rijetkost u našoj zemlji.

Gradonačelnik Sarajeva Alija Behmen posjetio NUBBiH

Prvi put za vrijeme svog mandata u funkciji gradonačelnika Sarajeva prof. dr. Alija Behmen posjetio je NUBBiH kako bi se lično upoznao sa uvjetima u kojima biblioteka radi, te razgovaralo o budućoj saradnji Grada Sarajeva i NUBBiH, posebno na projektu koji bi trebao biti zajednički, a to je obnova zgrade Vijećnice.

Gradonačelnik Behmen se upoznao sa prilikama u kojima NUBBiH djeluje i postoji, te sa svim nedaćama koje ima zbog nedostatka prostora, nedostatka finansijskih sredstava i nebrige domaćih vlasti o sudbini ove institucije, koja ove godine slavi 64. rođendan.

Glavna tema posjete, između ostalog, bile su i aktivnosti na obnovi zgrade Vijećnice, u kojoj je NUBBiH bila smještena do rata 1992. godine, kada je u plamenu izgubila većinu svoga fonda, blaga koje je decenijama čuvala. Zbog niza neslaganja između Grada Sarajeva i NUBBiH oko aktivnosti koje se vode na ovom projektu, na sastanku se pokušalo pronaći najoptimalnije rješenje.

Gradska uprava onoliko koliko to može u svom budžetu izdvaja sredstva u svrhu podrške izdavačkoj djelatnosti NUBBiH, a nadamo se da ta podrška neće izostati ni u narednim godinama.

Nova baza podataka na EBSCOhostu RESEARCH STARTERS - SOCIOLOGY

Zahvaljujući podršci kompanije EBSCO, svi registrirani korisnici EBSCOhosta u Bosni i Hercegovini dobili su besplatan pristup ovoj bazi podataka. Pristup će biti aktivan do 10. 6. 2010. godine.

Posjeta predstavnika EBSCO-a NUBBiH

NUBBiH je posjetio Dragan Nikolić, EBSCO predstavnik za jugoistočnu Evropu. Tim povodom razgovarao je sa direktorom dr. Ismetom Ovčinom u vezi sa daljim i budućim koracima saradnje. Sastanku su prisustvovali i Amra Rešidbegović, pomoćnica direktora za razvoj, i Edina Fazlagić, predsjednica EICBiH-a. Istaknuta je plodotvorna dosadašnja saradnja na ovom planu, a posebno to da NUBBiH ima mogućnost pretplate na ovu svjetski prepoznatljivu bazu podataka, koja se na ovaj način može koristiti na području BiH. Naglašena je činjenica da je časopis NUBBiH Bosniaca indeksiran u bazi podataka Central & Eastern European Academic Source, koja je dostupna preko informacionog servisa EBSCOhost.

Inače, sredstva za ovu bazu obezbijedila je i ove godine Vlada Kantona Sarajevo putem Ministarstva obrazovanja i nauke



U Centru za permanentno obrazovanje bibliotekara BiH održani stručni ispiti

U Centru za permanentno obrazovanja bibliotekara BiH ove godine održani su stručni ispiti za knjižničare, više knjižničare i bibliotekare. I ove godine bila su održana tri ispitna roka - u junu, oktobru i novembru.

Seminar „Digitalizacija – izgradnja digitalne biblioteke“, saradnja NUBBiH i Goethe Instituta

NUBBiH je u saradnji sa Goethe Institutom održala 28. septembra jednodnevni seminar na temu „Digitalizacija – izgradnja digitalne biblioteke“ s ciljem informiranja bibliotekara o mogućnostima i izazovima pri izgradnji digitalne biblioteke. Seminar je vodio Klaus Kempf, voditelj glavnog Odjela za izgradnju bibliotečkog fonda Bavarske državne biblioteke (BDB), a prisustvovali su predstavnici biblioteka sa područja cijele BiH.

Na početku je prikazan „Uvod u prezentaciju i predstavljanje rada Bavarske državne biblioteke“. Ova biblioteka je tokom Drugog svjetskog rata pretrpjela požar u kojem je izgubila dosta vrijednih kolekcija. Prema riječima gđina Kempfa, oporavak biblioteke je trajao skoro trideset godina. Danas Bavarska državna biblioteka broji oko 680 uposlenika i 10 miliona naslova i uz to jedan je od tri partnera „Njemačke virtualne nacionalne biblioteke“. Drugi dio seminara, pod nazivom „Digitalizacija“, sadržavao je ključne segmente procesa osnivanja digitalne biblioteke na primjeru BDB. Ovaj dio izlaganja obuhvatio je sve korake: od skeniranja do arhiviranja podataka. BDB je potpisivanjem sporazuma sa Googlom omogućila digitalizaciju svojih kolekcija na njihov trošak.

I ovaj seminar je dokaz uspješne saradnje Goethe Instituta i NUBBiH, koja je iz godine u godinu sve bolja.

Posjeta delegacije NUBBiH Franjevačkom muzeju i galeriji Gorica, te Gradskoj knjižnici Livno

Predstavnici NUBBiH, na čelu sa direktorom dr. Ismetom Ovčinom, posjetili su Franjevački muzej i galeriju Gorica, gdje su razgovarali s gvardijanom fra Markom Semrenom, direktorom Muzeja i galerije Josipom Gelom i bibliotekarkom Ružicom Barišić.

Potom su posjetili Gradsku knjižnicu u Livnu, gdje su se sastali sa ravnateljem Narodnog sveučilišta u sklopu kojeg djeluje knjižnica, Markom Hrgom i stručnim osobljem ove biblioteke. Posjeta ovoj knjižnici predstavlja vid redovnih aktivnosti u okviru vršenja matične funkcije NUBBiH.

Predstavnici NUBBiH imali su za cilj pružiti stručnu pomoć potrebnu za uređenje i proširenje biblioteke Franjevačkog muzeja i galerije Gorica.



Franjevački muzej i galerija Gorica Livno, nasljednik Franjevačke zbirke samostana na Gorici, ima svoje korijene u 19. stoljeću. Franjevački muzej i galerija posjeduju arheološku, etnološku, sakralnu, numizmatičku, filatelističku zbirku i zbirku starog oružja, stalnu postavku slika Gabrijela Jurkića, te bogatu biblioteku i arhiv.

Biblioteka ovoga samostana danas gotovo da i ne posjeduje duplikate, jer se zbog nedostatka prostora u biblioteci nalaze samo arhivski primjerci. Dio bibliotečke građe nema adekvatan smještaj, te je stoga potrebno hitno proširenje knjižnice, pri čemu će NUBBiH pružiti adekvatnu pomoć i podršku.

Pomenutim bibliotekama poklonjeni su paketi sa publikacijama čiji je izdavač Nacionalna i univerzitetska biblioteka Bosne i Hercegovine.

Rektor i generalni sekretar Univerziteta u Sarajevu posjetili NUBBiH – članicu UNSA

Prof. dr. Faruk Čaklovića, rektor Univerziteta u Sarajevu, i Zoran Selesković, generalni sekretar Univerziteta, posjetili su NUBBiH, te tom prilikom razgovarali s dr. Ismetom Ovčinom, direktorom NUBBiH, i saradnicima o ulozi i funkciji ove institucije u bosanskohercegovačkoj akademskoj zajednici, te mogućim vidovima saradnje u skoroj budućnosti.

„Teško je povjerovati da institucija poput vaše danas živi i radi u uslovima jedva mogućim za opstanak, a da pri tome redovno izostaje razumijevanje svih nivoa vlasti za instituciju koja je od vitalnog značaja za dalji napredak našega univerziteta i čitave akademske zajednice Bosne i Hercegovine. Univerzitet je spreman uraditi sve kao bi se promovirao interes i potreba za daljim radom i postojanjem ove institucije“, kazao je rektor Čaklovića.

Također je naglasio kako je Univerzitet spreman pružiti podršku NUBBiH, kao stalnoj članici Univerziteta, odnosno da će pokušati intervenirati kod pripadajućih ministarstava Kantona Sarajevo da se ovoj instituciji osigura veća finansijska



potpora. Uputit će dopis Kantonu Sarajevo s molbom da snosi troškove osnovnog održavanje zgrade NUBBiH, koja se i nalazi u okviru Kampusa Univerziteta u Sarajevu.

Dogovoreni su i budući koraci oko uređenja područja oko zgrade NUBBiH i načina na koji će Kampus funkcionirati kao cjelina. Između ostalog, određeno je da NUBBiH bude nosilac organizacionih aktivnosti oko pripremanja i održavanja Sajma knjiga, koji će biti upriličen povodom 60 godina postojanja i rada Univerziteta u Sarajevu.

„Zahvaljujemo se na ukazanom povjerenju i podršci. Svi naši kapaciteti i usluge su na raspolaganju čitavoj akademskoj zajednici BiH, svaki dan u našim čitaonicama smjenjuje se i više od 300 studenata Univerziteta u Sarajevu, korisnicima su na raspolaganju svjetske baze podataka, magistri i doktori BiH su u jedinstvenoj bazi Registra naučnih radnika Federacije BiH, održavamo izdavačku djelatnost, međunarodne agencije za ISSN, ISBN registrovane su u NUBBiH, članica smo mnogih svjetskih bibliotečkih asocijacija i organizacija... Međutim, finacijska podrška za naš trud i rad skoro uvijek je upitna“, kazao je dr. Ovčina.

Također, direktor Ovčina istakao je i veoma tešku situaciju u kojoj se NUBBiH nalazi pred početak grijne sezone, jer postoje realne šanse da radi duga većeg od 70.000 KM, koji Biblioteka nije u mogućnosti izmiriti, u ledenim prostorijama ostane 60 zaposlenih i 2.500 korisnika usluga NUBBiH.

NUBBiH – suorganizator 3. međunarodne konferencije BAM 2009

Asocijacija informacijskih stručnjaka – bibliotekara, arhivista i muzeologa po treći put je organizirala konferenciju BAM 2009 pod nazivom Evropske smjernice za saradnju biblioteka, arhiva i muzeja. Glavna tema BAM 2009. bila je Partnerstvo u digitalnom dobu.

Konferencija je održana u Sarajevu, u Bošnjačkom institutu, 16-17. oktobra 2009. godine. Konferenciju je zvanično otvorio prorektor za naučno-istraživački rad Univerziteta u Sarajevu prof. dr. Hazim Bašić.

Na konferenciji su se predstavile kolege iz BiH, Hrvatske, Mađarske, Njemačke, Slovenije i Srbije. Pored izlaganja, učesnici su mogli pogledati i poster prezentacije na kojima su bili predstavljeni neki od aktualnih projekata u pojedinim bibliotekama, arhivima i muzejima.

Partner konferencije su bili BH Telecom, a suorganizatori: Nacionalna i univerzitetska biblioteka BiH, Muzej Sarajeva, Bošnjački institut – Fondacija Adila Zulfikarpašića, ICOM BiH, Arhivističko udruženje BiH, Odsjek za komparativnu književnost i bibliotekarstvo Filozofskog fakulteta Univerziteta u Sarajevu, Biblioteka Sarajeva i Bibliotečko-informacioni centar Ekonomskog fakulteta u Sarajevu. Sponzori su bili: Općina Centar, EBSCO Publishing, C.E.E.O.L., OVID, Goethe-Institut, Bošnjački institut, ZYLAB, DISTI, Knjižare NUR, IPS BH, Jami, University Press, TKD Šahinpašić, Dokument Servis i Tondach.

NUBBiH dobila pristup C.E.E.O.L.-u

Besplatan pristup bazi C.E.E.O.L (Central and Eastern European Online Library) bio je omogućen do 16. novembra 2009. u NUBBiH.

C.E.E.O.L. je online arhiv koji omogućava pristup časopisima (više od 400 naslova) iz oblasti društvenih i humanističkih nauka sa područja Centralne i Istočne Evrope. Članci su dostupni u PDF formatu, bibliografski opisani i ne razlikuju se od printanog formata.

Direktori sedam institucija kulture od značaja za Bosnu i Hercegovinu obratili se nadležnima u BiH za rješavanje pitanja egzistencije ovih institucija

Pismo je upućeno na sljedeće adrese:

OHR, Valentin Inzko

Predsjedništvo Bosne i Hercegovine, predsjedavajući Željko Komšić,

Vijeće ministara BiH, prof. dr. Nikola Špirić, predsjedavajući,

Ministarstvo civilnih poslova BiH, Sredoje Nović, ministar,

Vlada Federacije BiH, Mustafa Mujezinović, premijer,

Ministarstvo kulture i sporta Federacije BiH, Gavrilo Grahovac, ministar,

Vlada Kantona Sarajevo, Besim Mehmedić, premijer,

Ministarstvo kulture i sporta Kantona Sarajevo, Emir Hadžihafizbegović, ministar

Tekst pisma:

Poštovani,

Neriješen pravni status sedam institucija kulture koje su do rata imale status državnih, a koji im do danas nije ni potvrđen ni dokinut (Zemaljski muzej BiH, Umjetnička galerija BiH, Kinoteka BiH, Muzej književnosti i pozorišne umjetnosti BiH, Historijski muzej BiH, Nacionalna i univerzitetska biblioteka BiH, Biblioteka za slijepa i slabovidna lica BiH) već 14 godina ponižava i obezvrjeđuje rad njihovih uposlenika i oni još od donošenja Zakona o radu nisu bili u situaciji da se u pravima i obavezama izjednače sa ostalim zaposlenicima u državi Bosni i Hercegovini.

Redovne aktivnosti i djelatnost ovih institucija dovedeni su u potpunosti u pitanje. Smanjen priliv sredstava za oko 40% od strane Kantona Sarajevo u 2009. godini, kao i značajna, ali ipak nedovoljna sredstva od strane Vijeća ministara, uzrokom su da sedam institucija kulture od državnog značaja sigurno idu prema totalnoj obustavi redovne djelatnosti, a samim tim

i ugrožavanja neprocjenjivog kulturno-historijskog bogatstva koji se u njima čuva.

Osnovni problemi mogu se precizirati u sljedećem:

Sredstva od Ministarstva civilnih poslova su značajna, ali nedostatna za redovnu – osnovnu djelatnost (plaće zaposlenika i materijalni troškovi). Sredstva su nedovoljna u iznosu od najmanje 30% za većinu od sedam ustanova.

Dosadašnja dinamika transferiranja sredstava iz Vijeća ministara, kalendarski gledano, odvijala se u mjesecu julu za tekuću godinu. Ova situacija uzrokuje i da sredstva koja su već ukalkulirana u redovnu djelatnost dolaze sa zakašnjenjem od 7 ili 8 mjeseci.

Godišnje uplaćena sredstva od Kantona Sarajevo su dostatna za najviše jedan do dva mjeseca u kalendarskoj godini, za većinu od sedam ustanova.

Na temelju iznijetog predlažemo da razrješite problem redovnog finansiranja sedam institucija od državnog značaja na način:

ili da Predsjedništvo BiH u postupku predlaganja, u budžet za 2010. godinu uvrsti ovih sedam institucija kulture, odnosno da utvrdi neophodan iznos sredstava koja će biti namijenjena isključivo za redovan rad institucija kojima je Bosna i Hercegovina osnivač, ili da Vijeće ministara (resorno Ministarstvo civilnih poslova) uveća grant od 3 miliona KM. Trenutni sistem raspodjele prema kojem se suma od 3 miliona KM dijeli na više desetina institucija kulture iz cijele Bosne i Hercegovine, uzrok su nedostatnog priliva finansijskih sredstava. Ako bi postojala mogućnost za uvećanjem granta preko Vijeća ministara povećala bi se suma za sedam institucija kulture od državnog značaja za šta su sredstva primarno i bila predviđena. Druge kulturne institucije u Bosni i Hercegovini (oba entiteta), koje također primaju sredstva od navedenog granta, naknadnim „kompromisnim rješenjima“, imaju riješeno redovno finansiranje;

ili uvećanje sredstava koja se uplaćuju od strane resornih ministarstava Kantona Sarajevo (Ministarstvo kulture i sporta i Ministarstvo nauke i obrazovanja) na način da razliku nedostajućih sredstava uplati Kanton Sarajevo,

ili HITNO reguliranje pravnog okvira, kao što je slučaj u nekim zemljama Zapadne Evrope, gdje državna Lutrija, Telecom, i sl., finansijski pomaže, a u nekim slučajevima i u cijelosti finansira institucije kulture,

ili HITNO reguliranje sistema „privremenog načina finansiranja“ prema kojem bi u sistemu SUFINANSIRANJA različita ministarstva od razine Kantona Sarajevo i Federacije Bosne i Hercegovine, uključujući i aktivni grant Vijeća ministara – Ministarstva civilnih poslova, po različitoj osnovi učestvovala u pokrivanju dijela redovnog finansiranja. Ovo se odnosi na ministarstva kulture i sporta, ministarstva nauke i obrazovanja, ministarstva turizma i okoliša, na razini Kantona Sarajevo i Federacije BiH, a u nekim slučajevima i ministarstva zdravlja ili ministarstva socijalne skrbi prema Biblioteci za slijepa i slabovidna lica. Navedene adrese (nabrojano SEDAM ministarstava) od Kantona Sarajevo, Federacije BiH, do Vijeća ministara bi participirali u sistemu SUFINANSIRANJA. Ovim načinom niti jedna razina ne bi bila u velikoj mjeri opterećena, a sedam ključnih institucija kulture u Bosni i Hercegovini bi mogli pokriti osnovne minimalne troškove za redovnu djelatnost.

Obraćamo se Predsjedništvu Bosne i Hercegovine sa zahtjevom da, poštujući zakonski okvir (Ustav BiH, Anex II, Tačka 2. i Tačka 4.), a u skladu sa svojim ingerencijama, poduzme aktivnosti na trajnom rješavju pravnog i finansijskog statusa institucija kojima je osnivač BiH.

Na temelju iznijetog tražimo od gore navedenih adresa da prime predstavnike sedam institucija kulture ili organiziraju zajednički sastanak, na kome bi se precizirale mogućnosti i način razrješenja ovog problema.

Želimo istaći da je do sada postojala podrška od svih navedenih ministarstava i državnih tijela, kao i mnogobrojnih ministarstava, koji su u granicama svojih mogućnosti pomagali različite djelatnosti naših institucija, razvojnih programa, projekata, na čemu se još jednom najiskrenije zahvaljujemo. I pored iskazanog, naša pozicija postaje sve alarmantnija, jer navedena namjenska sredstva se ne mogu utrošiti za redovne, režijske i materijalne troškove, plaće i doprinose.

Postizanje „političke volje“ da se riješe osnivačka prava za „7 institucija kulture od značaja za BiH“ je neizvjesno, a svako dalje prolongiranje rješavanja ove situacije dovest će u toku 2010. godine do totalnog kolapsa ovih ustanova. Mnoge od navedenih institucija sa više decenijskom tradicijom bit će primorane na obustavu svih aktivnosti, što može dodatno usložiti i onako neizdrživu situaciju u koju smo došli ne svojom krivicom. Arheološki i geološki eksponati stari i po više desetina hiljada godina, prirodoslovne zbirke među najvećim u Evropi i na svijetu, raritetni rukopisi, srednjovjekovne povelje, dokumenti, etnografski materijal sva tri konstitutivna naroda (Bošnjaka, Hrvata, Srba), umjetnine, slike poznatih slikara,

unikatni primjerci snimaka starih filmova, fototeke, bibliotečki fondusi, originalni rukopisi i predmeti poznatih pisaca, glumaca, režisera, najveći fondusi knjiga prilagođenih za slijepa i slabovidna lica u Bosni i Hercegovini bi mogli doći u priliku potpunog nestanka, kao i odlaska i osipanja malobrojnih uposlenih koji se brinu o ovom blagu.

Ne treba niti napominjati o kakvoj šteti za sve narode i cijelo društvo u Bosni i Hercegovini bi izazvalo ovakvo rješavanje problema koji dolazi do kulminacije. Prema finansijskoj konstrukciji iz tekuće 2009. godine, tempo i veličina uplata od strane Ministarstva civilnih poslova kao i Ministarstva kulture i sporta i Ministarstva nauke i obrazovanja Kantona Sarajevo, sedam institucija od državnog značaja neće biti u stanju da zaokruže poslovanje u 2010. godini.

Na ovaj način želimo da blagovremeno apeliramo i sugeriramo rješavanje pravnog, odnosno finansijskog statusa institucija kulture od značaja za Bosnu i Hercegovinu. U protivnom, javnost i svi odgovorni će biti svjedokom konačnog kraja ovih ustanova i okončanja dugogodišnjeg procesa uništenja preostalog kulturno-historijskog i prirodnog blaga koje je u velikoj mjeri, požrtvovanošću uposlenih, preživjelo.

S poštovanjem,

Zemaljski muzej BiH: dr. sci. Adnan Busuladžić

Nacionalna i univerzitetska biblioteka BiH: dr. sci. Ismet Ovcina

Umjetnička galerija BiH: prof. Meliha Husedžinović, muzejski savjetnik

Muzej književnosti i pozorišne umjetnosti BiH: prof. Methija Maglajlić, muzejski savjetnik

Historijski muzej BiH: prof. Muhiba Kaljanac, muzejski savjetnik

Biblioteka za slijepa i slabovidna lica: dipl. iur. Sakib Pleh

Kinoteka BiH: Ilija Radosavljević

Predstavljanje knjige austrijske književnice Eve Menasse

Austrijska ambasada i NUBBiH organizirali su susret na kojem je austrijska književnica Eva Menasse predstavila i čitala svoju knjigu "Lässliche Todsünden".

Eva Menasse, autorica i novinar, rođena je 11. 5. 1970. godine u Beču. Studirala je historiju i njemačku književnost. Imala je veoma uspješnu karijeru kao novinar, pišući za Frankfurter Allgemeine Zeitung u Frankfurtu i radeći kao dopisnik za Prag i Berlin. Napustila je novine da piše roman Vienna i sada živi i radi u Berlinu kao slobodni autor. Udata je za njemačkog pisca Michaela Kumpfmüllera. Njeni najznačajniji radovi su: Die letzte Märchenprinzessin, (with Elisabeth and Robert Menasse), 1997; Klein Menasses der mächtigste Mann, (with Elisabeth and Robert Menasse), 1998; Der Holocaust vor Gericht. Der Prozess um David Irving, 2000; Vienna, 2005. Najznačajnija njena nagrada je ona od Goethe Instituta za roman Beč.

Susret su uveličali Njegova Ekselencija Donatus Koeck, ambasador Republike Austrije u BiH, i njegova supruga. Susret s književnicom bio je upriličen u četvrtak, 26. 11. 2009. godine u zgradi Nacionalne i univerzitetske biblioteka BiH.

Apel javnosti o problemima NUBBiH upućen sa 15. sajma knjiga u Istri i okruglog stola o temi Što je meni sveučilišna knjižnica

U okviru 15. Sajma knjiga u Istri i okruglog stola o temi Što je meni sveučilišna knjižnica, učesnici ovog skupa su razmatrali svaku biblioteku posebno i zaključili da imaju profesionalnu i etičku obvezu i prema Nacionalnoj i univerzitetskoj biblioteci Bosne i Hercegovine. Stoga su uputili sljedeći

Apel javnosti

Pozivamo nadležno ministarstvo u Bosni i Hercegovini da osigura redovito i trajno financiranje Nacionalne i univerzitetske biblioteka Bosne i Hercegovine. Isto tako, smatramo da zgrada Vijećnice, iz koje je 1992. godine, granatama i vatrom istjerana memorija i višestoljetna kulturna baština Bosne i Hercegovine, treba OSTATI hram pisane riječi Bosne i Hercegovine.

Pozivamo sve učesnike Sajma i sveukupnu svjetsku javnost da nam se pridruže!



Apel javnosti potpisali su:

Tijana Barbić-Domazet i Tea Grujić, Sveučilišna knjižnica Pula
 Zdenka Petemanec, Univezitetna knjižnica Maribor
 Dragutin Katalenac, Gradska i sveučilišna knjižnica Osijek
 Nikola Marković, Univerzitetska biblioteka "Svetozar Marković" Beograd
 Sofija Bogojc, Sveučište u Dubrovniku
 Petar Krolo, Sveučilišna knjižnica u Splitu
 Mirta Matošić, Sveučilišna knjižnica Zadar
 Senka Tomljanović, Sveučilišna knjižnica Rijeka
 Alberto Manguel, gost autor Sajma

Tomaž Seljak, direktor IZUMA, posjetio NUBBiH

Mr. sci. Tomaž Seljak, direktor IZUM-a iz Maribora, posjetio je NUBBiH, te tom prilikom razgovarao s dr. Ismetom Ovčinom, direktorom NUBBiH, i Nevenkom Hajdarović, direktoricom ViBBiH-a, o eventualnim problemima i budućim koracima ka unapređenju sistema COBISS.BH.

Napomenuti su osnovni angažmani koje sprovodi IZUM, a to je nastojanje da uvede osnovnu automatizaciju u biblioteke u okruženju koje iz različitih razloga to same nisu u stanju, te aktivno učešće IZUM-a u globalnim nastojanjima obnove bibliotekarstva sa uključivanjem novih dostignuća informacijskih i komunikacijskih tehnologija u COBISS-u.

U ovoj godini održana dva kursa Katalogizacija – početni u okviru COBISS.BH

Članovi tima unutar Virtuelne biblioteke BiH pri NUBBiH i ove godine su bili aktivni na unapređenju sistema COBISS.BH, te edukaciji kadrova iz biblioteka novih članica sistema.

Tokom 2009. godine potpisano je 6 novih ugovora o ravnopravnom članstvu u COBISS.BH, te se tako broj ravnopravnih članica povećao na 40. U ovoj godini održana su dva kursa Katalogizacija – početni, i to u februaru i decembru, s ukupno 22 kandidata.

Također, održan je i sastanak Redakcije COBISS.BH, u čijem sastavu su Dženana Tuzlak (NUBBiH), Ines Ovčar (GKMO, Mostar) i Biljana Papić (NUBRS, Banja Luka). Na ovom sastanku dogovoreno je da se radi na ažuriranju šifarnika za UDK, te razgovarano o radu u sistemu generalno. Nisu istaknuti neki bitniji problemi pri radu u sistemu.

U segmentu Pozajmica davane su stručne konsultacije s ciljem automatizacije i ovog segmenta u bibliotekama koje su stekle uslove za to, odnosno bibliotekama koje imaju većinu fonda obrađenog u elektronskom katalogu. Dosada nisu zabilježeni veći problemi pri radu u ovom segmentu.

Sljedeći korak s ciljem unapređenja i proširivanja sistema jeste vođenje pregovora i priključenje novih članica iz Tuzlanskog kantona i Distrikta Brčko.

Kontinuirana saradnja sa Centrom Andre Malraux, koji u 2009. proslavlja 15. rođendan

U ovoj godini Centar Andre Marlaux, koji je nastao 1994. godine, u vrijeme opsade Sarajeva, slavi svoj 15. rođendan. Svrstao se među one čuvare nade koji su svojim aktivnostima pružali otpor i svojim sugrađanima slali poruku da je ovaj vid otpora isto toliko važan. Od tada je prošlo 15 godina i Centar je nastavio biti važan faktor u obnovi bh. društva. On je svih ovih godina bio spona između naše zemlje i ostatka svijeta. Favorizirao je prije svega razmjenu francuske i bh. kulture, ali i povezivao regiju sa drugim stranim zemljama.

Povodom 15. rođendana ovog centra u Umjetničkoj galeriji BiH otvorena je izložba fotografija pod nazivom „Naša priča“. Radi se o izložbi fotografija koja je objedinila nekoliko stotina fotografija i okupila neke od najvećih fotografa i ratnih reportera danas. Većina njih su bili svjedoci naše, sarajevske i bosanskohercegovačke priče, a njihova imena su nam dobro poznata.

Na otvorenju izložbe dr. Ismet Ovčina je direktoru Centra A. Malraux gospodinu Francis Buebu i ambasadorici Francuske N.J.E. Maryse Berniau čestitao na uspješnom radu i zahvalio na plodotvornoj saradnji, u nadi da će i u godinama koje slijede ostati takva.



N.J.E. Maryse Berniau, g. Francis Bueb i dr. Ismet Ovčina

Hadžem Hajdarević, predsjednik Upravnog odbora Fondacije za bibliotečku djelatnost, posjetio NUBBiH

U cilju podsticanja i razvoja bibliotečke djelatnosti, razvoja biblioteka te obezbjeđivanja uvjeta za jačanje knjižnog fonda u bibliotekama putem otkupa knjiga od izdavača na teritoriji Federacije Bosne i Hercegovine, Vlada FBiH osnovala je Fondaciju za bibliotečku djelatnost.

Na sastanku predsjednika Upravnog odbora Fondacije Hadžema Hajdarevića s dr. Ismetom Ovčinom, direktorom NUBBiH, i njegovim saradnicama doneseni su sljedeći zaključci:

U vezi sa pojavom nepravilne upotrebe CIP-a i ISBN-a, koje izdaje Agencija CIP i ISBN u NUBBiH, Fondacija za bibliotečku djelatnost će ubuduće, prilikom raspisivanja javnih poziva, tražiti od izdavača da za svaki pojedinačni naslov / knjigu za koji aplicira kod Fondacije priloži dokaz da su ispunjene zakonske obaveze prema NUBBiH, da je dostavljen obavezni

primjerak (10 primjeraka) svakog naslova sa validnim CIP-om , ISBN-om i ID-om. Potvrdu će izdavati Agencija za ISBN u NUBBiH bez dodatne naknade.

Podsjećanja radi, osnovni ciljevi Fondacije su podsticanje, razvoj, unapređivanje i modernizacija bibliotečke djelatnosti i to u domenu:

- otkupa knjiga i drugih izdanja za biblioteke kao podrška razvoju i obnovi bibliotečkog fonda,
- utvrđivanja instrumenata i procedura za transparentno korištenje sredstava Fondacije,
- podrške programima prikupljanja bibliotečkog fonda,
- stvaranja kvalitetnijih prostornih i tehničkih pretpostavki u oblasti bibliotekarstva,
- podrške programima približavanja knjige čitaocima i uključivanja većeg broja čitalaca sistemom razmjene bibliotečke građe i drugim savremenim metodama,
- podrške programima razvoja informacionih sistema i tehnološkim inovacijama u oblasti bibliotekarstva,
- podrške programima edukacije kadrova u oblasti bibliotekarstva,
- učešća u utvrđivanju politike za unapređivanje i modernizaciju bibliotekarstva,
- podrške nekomercijalnih projekata.

Sredstva za rad ovih fondacija će se osigurati u budžetu FBiH, a njihovu će imovinu činiti i dobrovoljni prihodi i pokloni, prihodi od kamata, dividendi, dobiti od kapitala, zakupnina, honorara i drugi na zakonu osnovani prihodi.

NUBBiH je u ovoj godini primila sljedeće zahvalnice i priznanja:

- Općina Goražde i JU Centar za kulturu Goražde povodom manifestacije „Sunce nad Drinom“ Dani Isaka Samokovlije, Goražde - Sarajevo – Fojnica 2009. uručili su NUBBiH zahvalnicu za pomoć u pripremi i realizaciji manifestacije
- Direktorica Bošnjačkog instituta – Fondacija Adila Zulfikarpašića uručila je NUBBiH zahvalnicu: „Srdačno vam se zahvaljujemo na poklonjenim knjigama, koje predstavljaju značajan doprinos bogaćenju bibliotečkog fonda Bošnjačkog instituta. Vaš poklon će biti čuvan i obrađen na odgovarajući način, te će služiti za naučnoistraživački rad budućih korisnika biblioteke.“
- Unsko-sanski kanton – Općina Bosanska Krupa i J.U. „Gradska biblioteka“ Bosoanska Krupa zahvaljuju NUBBiH za doprinos i unapređenje u radu i razvoju bibliotekarstva na području Općine Bosanska Krupa.
- Bosansko-podrinjski kanton – Goražde, Općina Goražde i J.U. Centar za kulturu Goražde uručili su Zahvalnicu NUBBiH za saradnju i doprinos u realizaciji manifestacije „Drinske večeri dječije poezije“ Goražde 2009.



Evropski kulturni parlament usvojio Rezoluciju podrške kulturnim institucijama u BiH

Internacionalni teatarski festival MESS pružio je punu podršku apelu koji su direktori sedam bh. institucija kulture od državnog značaja uputili najvišim zvaničnicima u BiH.

Direktor MESS-a Dino Mustafić naglašava da kultura predstavlja identitet jedne zemlje, što u slučaju BiH znači i svih njenih naroda.

„Zbog toga, potcrtavamo da ovdje nije riječ samo o nemaru nego o svjesnoj namjeri da se do temelja unište institucije koje čuvaju kulturno-historijsko blago i svjedoče o kompletnom kulturnom identitetu naše zemlje. Upravo iz ovih razloga neupitna je hitnost i važnost rješavanja pitanja održivosti ovih institucija“, istaknuo je Mustafić.

Na inicijativu Dine Mustafića, senatori Evropskog kulturnog parlamenta (European Cultural Parliament) usvojili su Rezoluciju podrške kulturnim institucijama u BiH.

Direktor MESS-a održao je govor na sjednici ovog parlamenta 12. decembra 2009. godine u Göteborgu, skrećući pažnju evropskih kulturnih djelatnika na sraman odnos bh. vlasti prema institucijama kulture u našoj zemlji.

„Kultura i umjetnost su neprijatelj broj jedan svake vlasti koja svoj opstanak na vrhu stavlja ispred interesa svojih građana. Činjenica je da su umjetnost i kultura u stanju da povezuju ljude, da otvaraju nove demokratske načine razmišljanja, da grade mostove među ljudima i donose promjene. Vlast u mojoj zemlji očito osjeća prijetnju od ideja koje mladi ljudi u Bosni i Hercegovini danas izražavaju kroz umjetnost. Zbog toga danas nacionalistička vlast u mojoj zemlji ukida budžete važnih kulturnih institucija“, rekao je u svom obraćanju Mustafić.

Njegov govor dočekan je neobično dugim i snažnim aplauzom, a ECP je po prvi put od svog osnivanja usvojio rezoluciju poput ove. U tekstu Rezolucije, između ostalog, stoji:

„Evropski kulturni parlament apeluje na vlasti Bosne i Hercegovine da konačno preuzmu odgovornost koju su im građani i građanke povjerili i da shodno evropskim kulturnim standardima podržavaju, finansiraju i unapređuju očuvanje kulturno-historijskog naslijeđa i kulturnih institucija koje su od neprocjenjive važnosti za državu BiH. Evropski kulturni parlament će u skladu sa svojim ovlaštenjima uputiti pismo Evropskom savjetu i Evropskoj komisiji u kojem će posebno skrenuti pažnju o potrebi ispunjavanju obaveza koje su bh. vlasti preuzele prihvatajući uslove za evropsku integraciju, a posebno onih iz sfere očuvanja kulturne baštine i umjetnosti.“



Dino Mustafić